

Mo te ingoa mo te tamaiti nei, kaore ahau i kite i te he o TE TOA TAKITINI. Kaua e waiho ta koutou whakahe i runga i te tikanga o te whakatauki e ki nei kei te whaiti ki Heretaunga anake. Kaore mo kona tenei ingoa, engari ma tona toa tonu ki te haere ki nga wahi katoa ki te nui o nga tangata hei hapai i a ia.

Waaka Toroaiwhiti. Nuhaka.

Taku ingoa mo te pepa ko TE RERENGA WAI-RUA. Tona kaupapa ko tearoha. Aroha ki nga tangata o te ao-tawhito kua ngaro ki te po, aroha hoki ki a tatou ki te hunga ora. Anei nga kupu tautoko mo te ingoa nei. Ka tae mai te wairua o te tangata, ka waiho tana whakaau i te Arai, he rae tenei e kokiri ana ki te moana whaka-te-Hauauru. Ka haere ka piki i te puke ki Haumu, ko te whakaau mutunga tenei. Ka kitea i konei, mehemea, he kota he pingao ranei te whakaau no te taha moana tenei tangata. Mehemea he rau rakau tana whakaau, no te ngahere tenei tangata. E kore e ngaro ta te rangatira puranga, e kore e ngaro ta te hanganoa puranga, te papai o nga kota, te kikino o nga kota. Pera ano nga rau-rakau. Ka haere i konei ka heke i te aka o te Reinga, ka tatu ki raro. Ko te tatau o te Po tenei. Ka ara te ngaru, ka ara hoki te rimu o Motau. Ko te taima tenei e rumaki ai te wairua, maea rawa atu i te puke ki Ohau. Ka huri mai te aroaro i reira ka tangi mai ki tenei ao. Hei kupu atu tenei ki a koutou kia awhinatia mai e koutou tenei ingoa, ara te huarahi i haere ai o tatou rangatira ka poto ki te mate. Ko tenei ingoa e pa ana ki te motu katoa me era atu moutere kei raro i te mana o te Tiriti o Waitangi. Mehemea he aroha to koutou hurihia mai o koutou pooti ki te ingoa nei hei karangaranga ma tatou ia tau ia tau. Ki te kore koutou e awhina mai, whakamutua te panui i nga matenga tupapaku me nga hurahanga kohatu. Kia ora katoa koutou. Hoatu te kororia ki te Atua mo nga mahi pai katoa. Ko ahau to koutou hoa aroha. Na Hapi Takimoana Te Aupouri, Te Kao.

**TAHUA ORANGA MINITA.** Kua tae mai te whakaatu a Apirana Ngata ki te Komiti Tumuaki o te Pihopatanga o Waiapu kei te whakahaere nga tangata o te Pariha o Hikurangi i tetahi Tahua mo to ratou Pariha. Ko taua Tahua he whenua, Kotahi mano e toru rau nga eka. Kei te pera ano hoki te tikanga a nga tangata o te Pariha o Waiapu, me o Te Kawakawa. Kia ora nga iwi o Ngati Porou e manaaki mai nei i nga tikanga e pa ana ki te taha wairua.